

34/2014 Foru Dekretua, urriaren 21ekoa, desgaituentzako laguntza-txakurren erregistroa sortzen duena eta laguntza-txakurrak halakotzat egiaztatzeko prozedura ezartzen duena.

OHARRA

Testu hau dibulgaziozkoa da soilik, eta ez du inolako izaera ofizialik. Araua osoa eta eguneratua jasotzen da bertan.

Eusko Legebiltzarrak 2007ko ekainaren 29an 10/2007 Legea onetsi zuen, ahalmen urrituentzako laguntza-txakurrei buruzkoa. Honako hau da lege horren xedea: beren desgaitasuna dela eta, laguntza-txakur baten laguntza behar duten pertsona guztiei aitortu eta bermatzea erabilera publikoko edozein toki, establezimendu edo garraiotan txakurrekin sartzeko, ibiltzeko edo egoteko eskubidea.

Lege horretako 3.4 artikulua araberan, foru aldundiei dagokie, zein bere lurraldean, txakurrei laguntza-txakurren aitortpena ematea eta txakur horiek identifikatzea, baita dagokien egiaztatzea lortzeko prozedura ezartzea ere.

Euskal Autonomia Erkidegoan, AEPA-Euskadi laguntza-txakurren elkarteak aritzen da laguntza-txakurrekin lanean eta haiek hezten, eta esperientzia handia eta fidagarritasun aitortua ditu arlo horretan. Horrez gainera, ONCEren itsu-txakurren fundazioak (FOPG) lan handia egiten du Espainiako Itsuen Erakunderako itsu-txakurrak hezten; beraz, aitortutako fidagarritasuna du arlo horretan.

Beste aldetik, Gipuzkoako Foru Aldundiaren esparru organiko eta funtzionalaren ikuspuntutik hartuta, gai hori Gizarte Politikako Departamentuaren arlokoa da, departamentu horrek lotura zuzena baitu desgaituei arreta ematen dien alorrekin.

Desgaituek arreta hobe eta aurreratuagoa jaso dezaten, foru dekretu honetan zera arautzen da: Gipuzkoako Lurralde Historikoan erroldatuta dauden eta bizi diren desgaituentzako laguntza-txakurrak nola aitortu eta identifikatu behar diren eta txakur horiek halakotzat jotzeko prozedura zein izango den.

Foru dekretu honetan jasota daude legeak desgaituentzako laguntza-txakurrak halakotzat jotzeko jartzen dituen baldintzak.

Azkenik, Euskal Autonomia Erkidegoko Laguntzako Animaliak Identifikatzeko Erregistroa dagoenez, Gizarte Politikako Departamentuak Eusko Jaurlaritzaren Nekazaritza eta Arrantza Sailaren laguntza izango du eginkizun horiek garatzeko.

Bat etorritz 1983ko azaroaren 25eko Legeak, Autonomia Erkidego osorako erakundeak eta bertako lurralde historikoetako foru organoen arteko harremanei buruzkoak, 7.c.1 artikuluan xedatutakoarekin, lurralde historikoetako foru organoei dagokien erakunde erkideetako legedia gauzatzea gizarte laguntzaren alorrean.

Horregatik, Gizarte Politikako Departamentuko foru diputatuak proposatuta eta Diputatuen Kontseiluak gaurko bileran alde aurretik eztabaidatu eta onartu ondoren,

XEDATZEN DUT

1. artikulua. Gaia.

Foru dekretu honen gaia da arautzea, Gipuzkoako Lurralde Historikoko esparruaren barruan, desgaituentzako laguntza-txakurrak halakotzat nola aitortu eta identifikatuko diren eta txakur horiek halakotzat egiaztatzekeo prozedura zein izango den, 2007ko ekainaren 29ko 10/2007 Legeak, ahalmen urrituentzako laguntza-txakurrei buruzkoak, 3.4 artikuluan eta baterakorretan xedatutakoa betez.

2. artikulua. Desgaituentzako laguntza-txakurrak erregistratzea.

1. Gipuzkoako Foru Aldundiko Gizarte Politikako Departamentuari atxikita, Desgaituentzako Laguntza-txakurren Erregistroa sortu da.

Gizarte Politikako Departamentuak, Ezinduen eta Desgaituen Laguntzako Zerbitzuaren bidez, desgaituentzako laguntza-txakurrak inskribatuko ditu erregistro horretan, eta laguntza-txakur bakoitzaren identifikazio liburuxka egingo du, foru agindu bitartez xedatutakoa betez.

2. Desgaituentzako laguntza-txakur bat halako bezala aipatutako erregistroan inskribatua izan dadin, pertsona interesatuak eskaera orria aurkeztu behar du, onartuko den ereduaren arabera ondo betea, eta dokumentazio hau aurkeztu behar du eskaerarekin batera:

a) Nortasun agiriaren kopia edo, bestela, eskatzailearen nortasuna legez egiaztatzen duen beste edozein agiriarena.

b) Eskaera egunean Gipuzkoako Lurralde Historikoan erroldatuta egotea egiaztatzen duen ziurtagiria, egiazko bizilekua egiaztatzen duten agiriez gain.

c) Euskal Autonomia Erkidegoko Animaliak Identifikatzeko Erregistro Orokorrean (AIEO) erregistratuta dagoenaren ziurtagiria.

Pertsona batek Gizarte Politikako Departamentuari baimena ematen badio b) eta c) letretan zehaztutako baldintzen egiaztapena beste administrazio batzuetan eskuratzeko, hark ez du aipaturako dokumentazioa aurkeztu beharrik izango.

d) Eskatzailearen argazki bat.

e) Txakurraren argazki bat.

f) Edo AEPA-Euskadi laguntza-txakurren elkartearen ziurtagiria, edo ONCEren itsu-txakurren fundazioarena (FOPG), edo Gipuzkoako Foru Aldundiak aitortutako estatu edo nazioarteko beste erakunde batena, laguntza-txakurrak hazteko kaudimen onartua badu. Ziurtagiri horretan egiaztatu behar da, orobat, txakurrak jaso duela desgaituei konpainia egiteko, laguntzeko eta haiek gidatzeko eskatzen den trebakuntza, eta titular eskatzaileak baduela aski prestakuntza eta jakintzarik txakurrak konpainia egin diezaion, lagundu diezaion eta gida dezan.

g) Albaitari baten ziurtagiria, non egiaztatuko den legeak eskatutako baldintza higieniko eta sanitarioak betetzen direla.

h) Hirugarrengoez paira ditzaketen kalteei erantzuteko, erantzukizun zibileko poliza bat izenpetu izana egiaztatzen duen ziurtagiria.

i) Desgaitasun maila aitortzeko ziurtagiria.

Pertsona batek aitortua badu eskatzen den desgaitasun maila, eta aitortzen hori Gipuzkoako Foru Aldundiko Gizarte Politikako Departamentuan badago edo beste administrazioen bidez eskuratzeko baimena ematen bazaio, pertsona horrek ez du aurreko dokumentazioa aurkeztu beharko.

3. Era berean, Laguntza-txakurren Erregistro Osagarria sortu da prestakuntza aldian dauden txakurrentzat. Erregistro horretan sartzeko baldintzak izango dira aurreko puntuan adierazitakoak, f) letrako baldintza salbu. Izan ere, baldintza horretako ziurtagiaren ordean, AEPA-Euskadi elkarteak, FOPG fundazioak edo kaudimenean aitortuko beste erakunde batek emandako ziurtagiri bat aurkeztuko da, non egiaztatuko den txakur erregistratua prestakuntza aldian dagoela eta ziurtagiria egin duenak kontrolatzen eta gainbegiratzen duela.

3. artikulua. Desgaituentzako laguntza-txakurrak erregistratzea eta Laguntza-txakurraren Txartela egitea.

Behin eskaera jaso eta dokumentazioa eta, behar izanez gero, txakurraren identifikazioa egiaztatzen direnean, administrazioko ebazpena emango da txakurra desgaituentzako laguntza-txakur gisa aitortu eta haren erregistroa baimentzeko eta laguntza-txakurraren txartela emateko, helburu horretarako onartuko den ereduaren arabera. Txartel horretan, titularrak gauza hauek erregistratu behar ditu:

- Albaitariaren sei hileko kontrolak, ekainaren 29ko 10/2007 Legeak eskatu bezala.

- Erantzukizun zibileko aseguruaren indarraldia eguneratua dagoela adierazten duen kontrola.

Txartelak bost urteko balioa izango du; aldi hori igarota, titularrak bere txartela berritu beharko du Ezinduen eta Desgaituen Laguntzako Zerbitzuan eta administrazioko ebazpena emango da

Txartelaren balio aldia igaro eta hura berritzea ez bada eskatzen, Ezinduen eta Desgaituen Laguntzako Zerbitzuak gorabehera horretaz ohartaraziko dio titularrari, eta adieraziko dio ezen, jakinerazpena jaso eta hurrengo hamabost egunen barruan ez badu txartela berritzen, txakurrak desgaituentzako Laguntza-txakurraren izaera galduko duela eta erregistroan baja emango zaiola, hurrengo artikuluan adierazten dena betez.

4. artikulua. Desgaituentzako laguntza-txakurraren izaera galtzea.

1. Kasu hauetakoren bat gertatuz gero, Gizarte Politikako Departamentuak adieraziko du delako txakurrak desgaituentzako laguntza-txakurraren izaera galdu duela, eta baja emango dio Laguntza-txakurren Erregistroan:

a) Erabiltzaileak ez badu desgaituentzako laguntza-txakurraren txartela berritu, behin igarota 3. artikuluko azken paragrafoko jakinarazpenean adierazten den epea.

b) Egiaztatzen bada erabiltzaileak txakurrari ez diola sei hileko azterketa egin.

c) Egiaztatzen bada hirugarren goen kalteak babesten dituen erantzukizun zibileko poliza ez dagoela indarrean.

d) Albaitari batek ziurtatuta, txakurrari nabarmentzen bazaio ez dela gai bere lana egiteko, edo moduren batean portaera oldarkorra erakusten badu, eta txakurra gainbegiratzeko ardura duen erakunde aitortuak hori gutzia ziurtatzen badu ikus-onetsi edo txosten bidez.

e) Txakurrarengan tratu txarrak nabarmentzen direnean, ebazpen administratiboaren bidez edo ebazpen judizialaren bidez zigortutakoak, 1993ko urriaren 29ko 6/1993 Legeak, Animalien Babesari buruzkoak, ezarritakoaren eta aplikagarria den gainontzeko arautegiak xedatutakoaren arabera.

2. Instrukzio-izapidea egin ondoren hartuko da laguntza-txakurraren izaera galtzea eta erregistroan baja ematea adierazten duen ebazpena. Instrukzio hori erabiltzaileari eta txakurra gainbegiratzeko erakunde aitortuari jakinaraziko zaie eta epe bat jarriko zaie, jakinarazpenaren biharamunetik hasita hamar eguneko epean beren alegazioak egin ditzaten edo omisioa zuzendu dezaten.

Xedapen gehigarri bakarra

Kaudimen aitortutako erakunde espezializatuak.

Dekretu honen ondorioetarako, kaudimen aitortuko erakunde espezializatuak hauek izango dira: AEPA-Euskadi laguntza-txakurren elkarte eta ONCEren itsu-txakurren fundazioa (FOPG).

Gipuzkoako Foru Aldundiko Gizarte Politikako Departamentuak elkarte edo federaziotako beste zentro batzuk ere kaudimen aitortuko erakunde gisa har ditzake, baldin eta laguntza-txakurrak trebatzen kalitateko estandar egokiak bermatzen badituzte. Aitorpen espedientea hasi daiteke edo erakunde interesatuaren eskariz, edo ofizioz, baldin eta aitortu gabeko erakunde batek emandako laguntza-txakur bat halakotzat aitortzea eskatzen bada. Espediente horretan kontsulta egingo zaie Gipuzkoako Foru Aldundiaren aintzatespena jadanik duten erakundeei.

Xedapen iragankor bakarra

Foru dekretu hau indarrean sartu aurretik egin diren eskaerak.

Foru dekretu hau indarrean sartu aurretik izapidetu diren eta ebazteke dauden eskaerak foru dekretu honetako prozeduraren arabera ebatziko dira, behin egiaztatuta 3. artikuluko baldintzak betetzen eta egiaztatzen dituztela.

Amaierako Xedapenak

Lehena. Gaikuntza.

Gizarte Politikako Departamentuko foru diputatuari ahalmena ematen zaio foru dekretu honetan xedatutakoa gauzatzeko behar diren egintza eta xedapenak erabaki ditzan.

Bigarrena. Indarrean sartzea.

Foru dekretu hau Gipuzkoako Aldizkari Ofizialean argitaratu eta hurrengo egunean sartuko da indarrean.